

四庫全書

集部

欽定四庫全書

集部

惜香樂府卷一  
三

詳校官中書臣呂光復

侍讀臣孫球覆勘

總校官降調編修臣倉聖脉

校對官學正臣周鎡

謄錄監生臣張炳

欽定四庫全書

集部十

惜香樂府

詞曲類一 詞集之屬

提要

臣

等謹案惜香樂府十卷宋趙長卿撰長卿  
自號仙源居士南豐人宗室子也是集凡春  
景三卷夏景一卷秋景一卷冬景一卷總詞  
三卷拾遺一卷據毛晉跋語乃當時鄉貢進  
士劉澤所定其體例殊屬無謂且夏景中如

減字木蘭花咏柳一闋書堂春輦下遊西湖  
一闋宜屬之春冬景中永遇樂宜屬之秋是  
分隸亦未盡愜也其詞往往瑕瑜互見如卷  
二中水龍吟第四闋以了少峭叶畫秀純用  
江右鄉音終非正律卷五中一剪梅尾句纔  
下眉尖恰上心頭勦襲李清照此調原句竄  
易二字殆於點金成鐵卷六中叨叨令一闋  
純作俳體已成北曲至卷七中一翫花一闋

本追和張先作前半第四句張詞三字一句  
四字一句此乃作七字一句後半末三句張  
詞四字二句五字一句此乃作三字一句五  
字二句是併音律亦多不協然長卿恬於仕  
進觴詠自娛隨意成吟多得淡遠蕭疎之致  
固不以一眚廢之他如小重山前闕結句用  
疎雨韻入芭蕉六字亦不合譜殆毛晉刊本  
誤增兩字又卷六中梅詞一首題曰一剪梅

而註曰或刻攤破醜奴兒不知此調非一剪  
梅當以別本為是卷五之似娘兒即卷八之  
青杏兒亦即名醜奴兒晉於似娘兒下註云  
或作青杏兒於青杏兒下註云舊刊攤破醜  
奴兒非不知誤在攤破二字醜奴兒實非誤  
刻是又明人校讐之失其過不在長卿矣乾  
隆四十六年九月恭校上

總纂官<sub>臣</sub>紀昀<sub>臣</sub>陸錫熊<sub>臣</sub>孫士毅

總校官臣陸費墀

欽定四庫全書

惜香齋  
提要

三

--	--	--	--	--	--	--	--



欽定四庫全書

惜香樂府卷一

宋 趙長卿 撰

春景

水龍吟

醺醺

韶華迤邐三春莫飛盡繁紅無數多情為與牡丹長約  
年年為主曉露凝香柔條千縷輕盈清素最堪憐玉質  
冰肌婀娜江梅謾休爭妬翠蔓扶疎隱映似碧紗籠

單越溪遊女從前愛惜嬌姿終日愁風怕雨夜月一簾  
小樓魂斷有思量處恐因循易嫁東風爛漫暗隨春去

念奴嬌

小春時候見早梅吐玉裁瓊粧白點點枝頭光照眼惱  
損柔腸情客暗裏芳心出羣標致經歲成疎隔如今風  
韻何人依舊冰雪冷豔瀟灑天然香姿肯易許遊蜂  
狂蝶夜半黃昏擔帶了多少清風明月宋玉雖悲元超  
雖恨見了千愁歇東君還許有情取次攀折

滿庭芳

爆竹聲飛屠蘇香細華堂歌舞催春百年消息經半已  
凌人念我功名冷落又重是一歲還新驚心事安仁華  
鬢年少已逡巡明知生似寄何須苦苦役慕蹄輪最  
難忘通經好學沉淪況是讀書萬卷孤負他此志難伸  
從今去燈牕勉進雲路豈無因

花心動

客中見寄  
煥香書院

風軟寒輕暗香飄撲面無限清楚乍淡乍濃應想前村

定是早梅初吐馬兒行過坡兒下危橋外竹梢疎處半  
斜露花花蕊蕊燦然滿樹一任看花凝竚因念我西  
園玉英真素最是繫心婉婉精神伴得水雲仙侶斷腸  
沒奈人千里無計向釵頭頻覷淚如雨那堪又還日莫

踏莎行

春莫

柳暗披風柔柔宿雨一番綠遍江頭樹鶯花已過苦無  
多看看又是春歸去病酒情懷光陰如許閒愁悄沒  
安排處新來著意與兜籠身心苦役伊知否

南歌子

早春

春色烘衣煖宮梅破鼻香盡驅和氣入蘭堂又是輕雲  
微雨下巫陽酒帶歡情重醺醺氣味長晚來拂拭略  
梳粧笑指一鉤新月上迴廊

蝶戀花

春深

宿雨新晴天色好穠李夭桃一夜都開了燕子歸來深  
院悄柳綿鋪逕無人掃咫尺鶯花還又老綠入閒階  
只有青青草參揣前期誰可表此情不語知多少

鷓鴣天

茶蘼

鏤玉裁瓊莫比香  
娉婷枝上殢春光  
風流別有千般韻  
割捨昏沉入醉鄉  
蜂共蝶儘乾忙  
檀心知未肯尋常  
從來詩苦人消瘦  
乞與幽牕富錦囊

又

春莫

蜂蜜釀成花已飛  
海棠次第雨臙脂  
園林檢點春歸也  
只有縈風柳帶垂  
情默默恨依依  
可人天氣日長時  
東風恰好尋芳去  
何事驅馳作別離

江神子

梅

年年長見傲寒林，壓羣英，有餘清。曾被芳心，紅日惱詩情。玉質暗香無限意，偏婉婉，儘輕盈。今年瀟灑照岐亭。更芳馨也，崢嶸無奈多情。終是惜飄零，誰與東君收拾。取怕風雨挫瑤瓊。

南歌子

荆溪寄南  
徐故人

春思濃如酒，離心亂似綿。一川芳艸綠生煙。客裏因循，重過豔陽天。屈指歸期近，愁眉淚灑然。無端還被此。

情牽為問桃源還有再逢緣

臨江仙

賞花

憶惜去年花下飲團樂爭看醪醕酒濃花豔兩相宜醉  
中嘗記得裙帶寫新詩還是春光驚已莫此身猶在  
天涯斷腸無奈苦相思憂心徒耿耿分付與他誰

一釐花

杏花

柳鶯啼曉夢初驚香霧入簾清胭脂淡注宮粧雅似文  
君猶帶春醒芳心婉婉媚容綽約桃李總消聲相如



春思正縈縈無奈惜花情曲欄小檻幽深處與慇懃遮  
護娉婷姚黃魏紫十分顏色終不似輕盈

青玉案

春暮

天涯目斷江南路見芳草迷風絮綠暗花梢春幾許小  
桃寂寞海棠零亂飛盡胭脂雨子規聲裏山城暮月  
挂西南夢回處滿抱離愁推不去雙眉百皺寸腸千縷  
若事憑鱗羽

醉蓬萊

賞郡圃芍藥

是三春已暮，浪蕊彫殘。牡丹零落，獨殿清和有佳名。芍藥淺淺，芳叢繡幢，鼎鼎更豔香。綽約渾似揚州畫樓捲起翠簾紅幙。倚檻輕盈，萬嬌千媚，故整霞裙笑花寂寞。太守風流，擁笙歌圍著，坐上詩人。二千里外，念此身飄泊。客眼看花歸心，對酒番成蕭索。

雨中花慢

春雨

宿靄凝陰，天氣未晴，峭寒勒住羣葩。倚欄無語，羞孤負、年華柳媚梢頭。翠眼桃蒸，原上紅霞可堪。那盡日狂風

蕩蕩細雨斜斜 東君底事無賴薄倖著意殘害鶯花  
惟是我惜春情重說奈咨嗟故與慇懃索酒更將油幕  
高遮對花歡笑從教風雨著醉酬他

驀山溪

早春

曉來雨霽弱柳搖新翠麗日媚東風正不暝不寒天氣  
幽禽弄舌花上訴春光高一晌低一晌清亮圓還碎  
那知時勢春亦元無意草木自敷榮似人生功名富貴  
我咱諳分隨有亦隨無不如富不憎貧歌酒閒遊戲

蝶戀花

芍藥開殘春已盡  
紅淺香乾蝶子迷  
花陣陣是清和人  
正困行雲散後空留恨  
小字金書頻與問  
意曲心誠未必他能信  
千結柔腸愁寸寸  
鈿釵幾日重相近

虞美人

清婉亭  
賞酴醾

江梅雖是孤芳早  
爭似酴醾好  
凡紅飛盡草萋迷  
婀娜枝頭纔見細腰肢  
玉容消得仙源惜  
滿架香堆白檀心  
應共酒相宜  
割捨花前猛飲倒金卮

又

水塘淺綠生芳草枝上青梅小柳眉愁黛為誰開似向  
東君喜見故人來 碧桃銷恨猶堪愛妃子今何在風  
光小院酒尊同向晚一鉤新月落花風

江神子

小溪清淺照孤芳葢珠娘暗傳香春染粉容清麗傳宮  
粧金縷翠蟬曾記得花密密過雕牆 而今冷落水雲  
鄉念平康轉情傷夢斷巫雲空恨楚襄王冰雪肌膚消

瘦損愁滿地對斜陽

醉蓬萊

是平分春色夢草池塘暖風簾幕昨夜三台燦天邊芝  
角自是君家慶流澤遠降生申崧岳厚德溫良高才粹  
雅淵源學博何事丹墀尚淹閣步未許中原少勤方  
略且對笙歌醉黃金錯落蒞洞珠宮媚人桃李趣青春  
綽約綠意紅情成陰結子五雲樓閣

臨江仙

春暮

春事猶餘十日吳蠶早已三眠多情忍對落花前  
酴醾飄暎雪荷葉媚晴天香淡無心浸酒綠浮可意邀船  
時光堪恨也堪憐單衣三月莫歌扇一番圓

青玉案

社日  
客居

去年社日東風裏向三徑開桃李脆管危絃隨意起綠  
陰紅影暎香繁葢伴我醺醺醉今年社日空垂淚客  
舍看花甚情意江上危樓愁獨倚欲將心事巧憑來燕  
說與人顚顚

南歌子

春莫  
送別

枝上紅飛盡梢頭綠已勻  
遊絲柳絮媚青春向晚暝風  
簾幕練光新  
春已匆匆去那堪話別情  
劉郎幾日便  
登程告你覓些歡笑送行人

醉落魄

春深

麥畦勻綠枝頭屑屑飛梅玉  
傷心何事人南北斷盡回  
腸忍聽陽關曲  
倚窓青蔭亭亭竹好風敲動聲相續  
夜闌怕見銀臺燭會得離情他也淚速速



點絳脣

春思

密雨隨風昨來一夜簷聲溜奈何倬傔官路梅花瘦

賦得多情怕到春時候如今一病非因酒試問君知否

又

柳

春到垂楊嫩黃染就金絲軟麗晴新煥湧翠千山遠

為甚年年眉向東風展閒消遣欲歸猶嬾漁笛天將晚

又

春半

輕煥輕寒賞花天氣春將半柳搖金線求友鶯相喚

玉腕蛾眉意眼頻頻眇歌喉軟玉卮受勸一醉應相拌

又

春雨

夜雨如傾滿溪添漲桃花水落紅鋪地枝上堆濃翠

去年如今常伴酴醾醉今年裏離家千里獨洒東風淚

又

春莫

啼鳥喃喃恨春歸去春誰管日和風煥綠暗閒庭院

還憶當年綺席新相見人已遠水流雲散空結多情怨

鷓鴣天

詠茶  
簾

弱質纖姿儷素粧水沉山麝鬱幽香直疑姑射來天上  
要惱人間傅粉郎揀釀酒枕為囊更餘風味勝糖霜  
肯如紅紫空姚冶謾惹遊蜂戲蝶忙

又

玉容應不羨梅粧檀心特地賽爐香半藏密葉牆頭女  
勾引酖顏馬上郎樽乏酒且傾囊蟹螯糟熟似黏霜  
一年光景渾如夢可惜人生忙處忙

又

洗盡鉛華不著粧一般真色自生香  
飄飄何處凌波女故故相迎馬上郎  
尋譜牒發詩囊絕勝梅萼嫁冰霜  
故山寒食依然在勾引東坡旅興忙

又

鏤玉裁瓊學靚粧不須沉水自然香  
好隨梅蕊粧宮額肯似桃花誤阮郎  
羞傳粉賤香囊何勞傲雪與凌霜  
新來勾引無情眼拌為東風一晌忙

又

綽約肌膚巧樣粧風流元自有清香未應傳粉疑平叔  
却笑荷花似六郎浮蟻甕入詩囊學人消瘦怯風霜  
午窓一枕莊周夢甘作花心粉蝶忙

探春令

元夕

去年元夜正錢塘看天街燈火鬧蛾兒轉處熙熙語笑  
百萬紅粧女今年肯把輕孤負列熒煌千炬趁閒身  
未老良辰美景款醉新歌舞

小重山

殘春

清曉窓前杜宇啼遊仙驚夢醉斷魂迷起來窓下看盆  
池傷春去消瘦不勝衣 柳陌記年時行雲音信杳與  
心違空教攢恨入雙眉人已遠紅葉莫題詩

又  
殘春

綠樹陰陰春已休羣花飄盡也不勝愁遊絲飛絮兩悠  
悠迷芳草日暝雨初收 深院小遲留好香燒一炷細  
煙浮更聽羯鼓打梁州惱人處宿酒尚扶頭

菩薩蠻

梅花有意舒香粉舒香已得先春信香與露華新露濃  
愁殺人酒多愁愈重此意誰能共淚濕染衣斑夜霜  
金縷寒

又

梅花枝上東風軟朝來吹散真香遠雅淡有餘清客心  
和淚傾美人臨別夜月晃燈初地玉枕小屏山眉尖  
曾細看

惜香樂府卷一



欽定四庫全書

惜香樂府卷二

宋 趙長卿 撰

春景

水龍吟

梅詞

煙姿玉骨塵埃外看自有神仙格花中越樣風流曾是  
名標清客月夜香魂雪天孤豔可堪憐惜向枝間且作  
東風第一和羹事期它日 聞道春歸未識問伊家却

知消息當時惱殺林逋空遶團欒千百橫管輕吹曲欄  
香散阿誰偏得壽陽宮應有佳人待與點新粧額

又

葦綃開得仙花就中最有佳人似香肌勝雪千般揉縛  
禁他風雨縞夜精神繁春標致忍教孤負悵潘郎去後  
河陽滿縣知他是誰為主多謝文章吏部遇銜盃不  
曾輕許應知這底無言情緒難為分付吹遍春風耀殘  
明月總傷心處待閒亭夜永遊人散後作飛仙去

又  
驚詞

天教占得如簧巧聲乍囀千嬌媚金衣襯著風流模樣  
於中可是紅杏香中綠楊陰處多應饒你向黃昏苦苦  
嬌啼怨別那堪更東風起別有詩腸鼓吹未關他等  
閒俗耳雙柑斗酒當時曾是高人留意南國春歸上陽  
花落止添顚顚念啼聲欲碎何人解作留春計

又  
雨詞

淡煙輕靄濛濛望中乍歇凝晴晝纔驚一霎催花還又

隨風過了清帶梨梢暈含桃臉添春多少向海棠點點  
香紅染遍分明是胭脂透無奈芳心滴碎阻遊人踏  
青攜手簷頭線斷空中絲亂纔晴却又簾幙閒垂處輕  
風送一番寒峭正留君不住瀟瀟更下黃昏後

聲聲慢

草詞

濃芳滿地秀色連天和煙帶雨萋萋幾許芳心還解報  
得春暉當時謝郎夢裏似慙慙傳與新詩却為甚動長  
門怨感南浦傷離追想天涯行客應解擁車輪步步

相隨惆悵如絲正是欲斷腸時憑高望中不見路悠悠  
南北東西春去也怨王孫猶自未歸

又

詞柳

金垂煙重雪颺風輕東風慣得多嬌秀色依依偏應綠  
水朱樓腰肢先來太瘦更眉尖惹得閒愁牽情處是張  
郎年少一種風流別後長堤目斷空記得當時馬上  
牆頭細雨輕煙何處夕繫扁舟叮嚀再須折贈勸狂風  
休挽長條春未老到成陰終待共遊

南歌子

莫春  
值雨

黯靄陰雲覆滂沱急雨飛洗殘枝上亂紅稀恰是褪花  
天氣困人時向曉春酲重倦人起較遲薄羅初見試  
輕衣笑拭新粧須要翦酴醾

浣溪沙

春  
深

寒食風霜最可人梨花榆火一時新  
心頭眼底總宜春  
薄莫歸吟芳艸路落紅深處鷓鴣聲  
東風疎雨喚愁

生

又春  
莫

柳老拋絲春已深  
夾衣初試曉寒輕  
別離無奈此時情  
先自愁懷容易感  
不堪聞底子規聲  
西樓料得數回程

又早  
春

不憤江梅噴暗香  
春前臘後正淒涼  
霜風雪月忍思量  
斜倚幽林如有恨  
玉鱗飛後轉堪傷  
時人那解惜孤芳

朝中措

梅

別來無事不思量  
霜日最淒涼  
凝想倚欄干處  
攢眉應為蕭郎  
梅花豈管人消瘦  
只恁自芬芳  
寄語行人知  
否梅花得似人香

桃源憶故人

初春

夜來一夜東風暝  
春到桃腮柳眼  
對景可堪腸斷  
強把愁眉展  
花期惹起歸期  
念前事從頭忖  
遍凝想水遙山遠  
空結相思怨



長相思

春濃

花飛飛柳依依簾捲東風日正遲社前雙燕歸  
藥欄

東藥欄西記得當時素手攜彎彎月似眉

感皇恩

柳

景物一番新熙熙時候小院融和漸長晝東君有意為  
憐纖腰消瘦軟風吹破眉間皺  
嫋嫋枝頭輕黃微透  
舞到春深轉清秀錦囊多感又更新來傷酒斷腸無語  
凭欄久

探春令

早春

笙歌間錯華筵啟喜新春新歲菜傳纖手青絲輕細和  
氣入東風裏 幡兒勝兒都姑姊戴得更忙戲願新春  
已後吉吉利利百事都如意

菩薩蠻

春深

赤欄干外桃花雨飛花已覺春歸去柳色碧依依濃陰  
春晝遲 海棠紅未破勻糝胭脂顆風雨也相饒應憐  
粉面嬌

醜奴兒

春殘

牡丹已過酴醾謝  
飛盡繁花濃翠  
號鴉綠水橋邊賣酒  
家年時攜手尋春去  
滿引流霞往事堪嗟  
猶喜潘郎鬢未華

浣溪沙

寵姬小春

簾捲輕風憐小春  
荷枯菊悴正愁人  
江梅喜見一枝新  
料得主人偏愛惜  
也應冰雪好精神  
故園桃李莫生嗔

清平樂

問訊  
梅花

楚梅嬌小好是霜天曉宿酒惱人香暗遶浸影碧波池  
沼生成素淡芳容不須抹黛勻紅準擬成陰結子莫  
教枉費春工

又

早起  
聞鶯

綺疏新曉學語雛鶯巧煙暝瑤堦梧葉老滿地東風芳  
草少年不合風流償他酒債花愁望斷綠蕪春去銷  
魂嬾上層樓

更漏子

莫春

日彤彤風蕩蕩  
簾外柳花飛  
鵬紅有限綠無窮  
雨晴芳徑中  
腸寸結縈離別  
還是去年時  
節春莫也  
子規啼傷春三月時

訴衷情

重臺梅

檀心刻玉幾千里  
開處對房櫳  
黃昏淡月籠  
豔香與酒爭濃  
宜輕素鄙輕紅  
思無窮  
化工著意南南北北  
一種東風

小重山

楊花

枝上楊花糝玉塵。晚風扶起處，雪輕盈。撲人點點細無聲。誰能惜，撩亂滿江城。忍淚未須傾。十年追往事，嘆流鶯曉來雨過，轉傷情。鋪池綠，遺恨寄浮萍。

蝶戀花

春殘

綠盡燒痕芳艸遍。不暝不寒，切莫孤良宴。罨畫屏風開羽扇。薄羅衫子仙衣練。晚雨小池添水面。戲躍蘋鱗，又向波心見。持酒聽伊聲宛轉。樽前唱徹昭陽怨。

鷓鴣天

燕 詠

梁上雙雙海燕歸故人應不寄新詩  
柳梧陰裏高還下  
簾幙中間去復回  
追盛事憶烏衣  
王家巷陌日沉西  
興亡無限驚心語  
說向時人總不知

又

春 殘

謾謾東風作雨寒無言  
獨自凭欄干  
綠肥紅瘦春歸去  
恨逼愁侵酒怎寬  
追往事惜花殘  
殘花往事總相關  
風光臺上傷心處  
此意人休作等閒

探春令

尋春

新元纔過漸融和氣先到簾幃  
謾閒遶柳徑花蹊裏探  
看試春來未年時曾把春拋棄  
與春光陪淚待今春  
日日花前沉醉款細偎紅翠

又

立春

數聲回雁幾番疎雨東風回暝  
甚今年立得春來晚過  
人日方相見縷金幡勝教先辦  
著工夫裁翦到那時  
覩當須教滴惜稱得梅粧面



又賞梅

十首

冰檐垂箸雪花飛絮時方嚴肅向尋常搖曳凡花野草  
怎生敢誇紅綠江梅孤潔無拘束祇溫然如玉自一  
般天賦風流清秀總不同粗俗

又

而今風韻舊時標致總皆奇絕再相逢還是春前臘後  
粉面凝香雪芳心自與羣花別儘孤高清潔那情懷  
最是與人好處冷淡黃昏月

又

彫牆風定綺窗燭地沉吟獨坐料雪霜深處司花神女  
暗裏焚百和惱人一陣香初過把清愁熏破更那堪  
得水姿玉貌痛與惜則箇

又

龜紗隔霧繡簾鉤月那時曾見照影兒覷了千回百轉  
素豔明於練柔腸堆滿相思願更重看幾遍是天然  
不用施朱攏翠羞損桃花面

又

疎籬橫出綠枝斜  
露笑盈盈地  
悄一似初覩東鄰女  
有無限風流意  
半開折得瓊瑰蕊  
惹新香沾袂  
放曲屏珠晃膽瓶兒裏  
伴我醺醺睡

又

冰澌池面抑搖金  
線春光無限問  
梅花底事收香藏蕊  
到此方舒展  
百花頭上俱休管  
且驚開俗眼看  
綠陰結子成功調鼎  
有甚遲和晚

又

溪橋山路竹籬茆舍淒涼風雨被摧殘沮挫精神依舊  
無奈相思苦東君故與收拾取忍教他塵土向綠窗  
繡戶朱欄小檻做箇名花主

又

雨孱風瘦雪欺霜妬時光牢落怎奈向天與孤高出衆  
一任傍人惡凡花且莫相嘲謔儘強伊寂寞便饒他  
百計千方做就醞藉如何學

又

樓頭月滿欄干風度有人腸斷為多情役得神魂撩亂  
又被梅縈絆對花沉醉應須拌且尊前相伴恨無端  
玉笛穿簾透幙好夢還驚散

又

清江平淡暗香瀟洒滿林風露漸枝上也學楊花柳絮  
輕逐春歸去東君著意勤遮護總留他不住幸西園  
別有能言花貌委曲關心懽

惜香樂府卷二

欽定四庫全書

惜香樂府卷三

宋 趙長卿 撰

春景

寶鼎現

上元

鶯塵盡埽碧落輝騰元宵三五更漏永遲遲停鼓天上  
人間當此遇正年少盡香車寶馬次第追隨士女看往  
來巷陌連鶯簇起星毬無數 政簡物阜清閒處聽笙

歌鼎沸頻舉燈焰暝庭帷高下紅影相交知幾戶恣歡  
笑道今宵景色勝却前時幾度細算來皇都此夕饒得  
喧傳令古綺席成行爐噴裊沉檀輕縷覩遨遊綵仗  
疑是神仙伴侶欲飛去恨難留住漸到蓬瀛步願永逢  
恁時恁節且與風光為主

青玉案

殘春

梅黃又見纖纖雨客裏情懷兩眉聚何處煙村啼杜宇  
勸人歸去早思家轉聽得聲聲苦利名縈絆何時住



惱亂愁腸成萬縷  
滿眼興亡知幾許  
不如尋個老松石  
畔作個柴門戶

燭影搖紅

深春

梅雪飄香杏花開  
豔燃春晝銅駝煙  
淡曉風輕搖曳青  
青柳海燕歸來未  
久向雕梁初成對  
偶日長人困綠水  
池塘清明時候  
簾幙低垂麝煤煙  
噴黃金獸天涯人  
去杳無憑不念東  
陽瘦眉上新愁壓  
舊要消遣除非殢  
酒酒醒人靜月滿  
南樓相思還又

念奴嬌

梅影

銀蟾光滿弄餘輝冷浸江梅無力緩引柔條浮素蕊橫  
在閒窗虛壁染紙揮毫粉塗墨暈不似令端的天然造  
化別是一般清瘦蹤跡今夜翠葆堂深夢回風定因  
月才相識先自離愁那更被曉角殘更催逼曙色將分  
輕陰移盡過眼難尋覓江南圖上畫工應為描得

又

落梅

玉龍聲香正瑤臺曲舞香山初徹褪粉搯酥千萬顆滿

地平鋪銀雪草褥香茵苔錢買住留待黃昏月有人粧  
罷對花凝竚愁絕休更恨落羞開東君情分自古多  
離別好把芳心收拾取與個和羹人說擺脫風塵消停  
酸苦終有成時節浮花浪蕊到頭不是生活

阮郎歸

咏春

和風暝日小層樓人間春事幽杏花深處一聲鴉花飛  
水自流尋舊夢續揚州眉山相對愁憶曾和淚送行舟  
清江古渡頭

虞美人

春寒

東風捲盡辛夷雪，逆旅清明節。  
黃昏煙雨失前山，陟遍朱欄，酒噤不禁寒。  
歸來誰護衣篝火，倒擁文鴛臥。  
可堪連夜子規啼，喚得春歸人却未成歸。

漁家傲

梅

蕙死蘭枯金菊槁，返魂香入江南早。  
竹外一枝斜更好，誰解道，古今惟有東坡老。

坡梅詩云竹外一枝斜更好

去歲花前

人醉倒，酒醒花落無人埽。  
今歲花開人未到，愁滿抱，青

山一帶連芳草

念奴嬌

梅

蘭枯菊槁是返魂香入江南春早谷靜林幽人不見夢  
與梨花顛倒雪刻檀心玉勻豐頰粧趁嚴鐘曉海仙么  
鳳綠衣何處飛遶竹外孤裊一枝古今解道只有東  
坡老莫倚廣平心似鐵閒把珠璣揮掃桃李興臺冰霜  
賓客月地還淒悄暗香消盡和羹心事誰表

玉樓春

春半

江村百六春強半拍拍池塘春水滿風團柳絮舞如狂  
雨壓橘花香不散陰陰巷陌閒庭院小立危欄羞燕  
燕不知何事未還鄉除却青春誰作伴

謁金門

莫春

風又雨滿地殘紅無數花不能言鶯解語曉來啼更苦  
把酒東臯日莫抵死留春春去擬倩楊花尋去處楊  
花無定據

眼兒媚

春晚

樓上黃昏杏花寒斜月小闌干一雙燕子兩行歸雁畫  
角聲殘綺窗人在東風裏無語對春閒也應似舊盈  
盈秋水淡淡春山

菩薩蠻

殘春

楊花飛盡鶯聲澀杜鵑喚得春歸急病酒起來遲嬌慵  
嬾畫眉寶奩金鴨冷重喚燒香餅著意煉龍涎纖纖  
手連煙

畫堂春

長新亭  
小飲

小亭煙柳水溶溶  
野花白白紅紅惱人池上晚來風吹  
損春容  
又是清明天氣記當年小院相逢憑欄幽思  
幾千重殘杏香中

又賞海  
棠

夜來暝趣海棠時  
臉邊勻透胭脂亂紅嬌影困垂垂睡  
損楊妃  
多少肉溫香潤朱脣綠鬢相偎晚風何苦過  
臺西斷送春歸

卜算子  
春景



春水滿江南三月多芳艸幽鳥銜將遠恨來一一都啼  
了不學鴛鴦老回首臨平道人道長眉似遠山山不  
似長眉好

念奴嬌

梅

見梅驚笑問經年何處收香藏白似語如愁却問我何  
苦紅塵久客觀裏栽桃仙家種杏到處成疎隔千林無  
伴淡然獨傲霜雪且與管領春迴孤標爭肯接雄蜂  
雌蝶豈是無情知受了多少淒涼風月寄隴人遙和羹

心在忍使芳塵歇東風寂寞可憐誰與攀折

又梅

水邊籬落獨橫枝冉冉風煙岑寂踏雪尋芳村路永竹  
屋西頭遙識蕙艸香銷小桃紅未醉眼驚春色離愁何  
處斷腸無限陳跡顚顚素臉朱脣天寒日暮倚闌干  
無力歲晚天涯驛使遠難寄江南消息自笑平生憐清  
惜淡故園曾親植百花雖好問還有恁標格

菩薩蠻

梅

肩輿曉踏江頭月月華冷浸消殘雪雪月照疎籬梅花  
三兩枝人憐花淡薄花恨人牢落不似那回時醺醺  
醉玉肌

點絳脣

梅

開盡梅花雪殘庭戶春來早歲華偏好只恐催人老  
惟有詩情猶被花枝惱金樽倒共成歡笑終是清狂少

鷓鴣天

梅

手種梅花三四株要看冰霜照清臞朝來幾朵茆檐下

竹外江頭恐不如  
凝玉面吐香鬚  
莫嫌孤瘦漸豐餘  
化工不肯孤人意  
做底懽娛報答渠

又送

春

只慣嬌癡不慣愁  
離情渾不挂眉頭  
可憐惱盡尊前客  
却趁東風上小舟  
真個去不懽留  
落花流水一春休  
自憐不及春江水  
隨到滕王閣下流

瑞鶴仙

莫春有感

海棠花半落  
正蕙圓風生  
蘭亭香撲青英  
暝池閣任翻

紅飛絮遊絲穿幙情懷易著奈宿醒情緒正惡嘆韶光  
漸改年華荏苒舊歡如昨追念凭肩盟誓枕臂私言  
盡成離索記得忘却當時事那時約怕燈前月下得見  
則個厭厭只待覷著問新來為誰縈牽又還瘦削

臨江仙

莫春

過盡征鴻來盡燕故園消息茫然一春顚顚有人憐懷  
家寒食夜中酒落花天見說江頭春浪渺慙慙欲送歸  
船別來此處最縈牽短篷南浦雨疎柳斷橋煙

一叢花

莫春  
送別

堦前春草亂愁芽  
塵暗綠窗紗  
釵盟鏡約知何限  
最斷腸  
湓浦琵琶南渚  
送船西城折柳  
遺恨在天涯  
夜來魂夢到儂家  
一笑臉如霞  
鶯啼燕恨西窗下  
問何事  
潘鬢先華  
鐘動五更魂歸千里  
殘角怨梅花

清平樂

春景

霽光搖目春入郊  
原綠殘雪壓枝堆  
爛玉時向林間  
荻杖藜細履平沙  
醉中一任歌斜  
落日數聲啼鳥香

風滿路梅花

朝中措

咏春

亂山疊疊水泠泠  
南北短長亭  
客路如天杳杳  
歸心特地寧寧  
春光苒惹  
花朝冷落  
酒伴飄零  
鬢影黃邊半白  
燒痕黑處重青


柳梢青

春詞

桃杏舒紅遲遲暝  
日媚景芳濃  
紫燕穿簾  
香泥著地  
未乳巢空  
千山萬水  
重重煙雨裏  
王維畫中芳草斜陽

無人江渡蓑笠漁翁

卷三



惜香樂府卷三



欽定四庫全書

集部

惜香樂府卷

四至六

詳校官中書

臣呂光復

侍讀臣孫球覆勘

總校官降調編修

臣倉聖脉

校對官學正

臣周

鉉

謄錄監生

臣張

炳

欽定四庫全書

惜香樂府卷四

夏景

花心動

荷花

綠水平湖浸芙蓉  
爛錦豔勝傾國半  
欽半開斜立斜欹  
好似困嬌無力水  
仙應赴瑤池宴醉  
歸去美人扶策駐  
香駕擁波心媚容  
倩粧顏色曾見苔  
川澄碧勻粉面

宋 趙長卿 撰

溪頭舊時相識翠被繡裯彩扇香篝度歲杳無消息露  
痕滴盡風前淚追往恨悠悠蹤跡動怨憶多情自家賦  
得

鼓笛慢

甲申五月仙源試新水雨過絲生荷  
香襲人因感而賦此詞斯時病眼

暑風吹雨仙源過深院靜涼於水蓮花郎面翠幢紅粉  
烘人香細別院新番曲成初按詞清聲脆奈難堪羞澀  
朦朧病眼無心聽笙簧美還記當年此際嘆飄零萍  
蹤千里楚雲寂寞吳歌淒切成何情意因念而今水鄉

瀟灑風亭高致對花前可是十分蒙斗肯孤歡醉

念奴嬌

碧含  
笑

晚粧纔罷見攏絲勻玉一團嬌秀趁得年光長是向金  
谷無花時候不比鶯鶯不關燕燕不似章臺柳清涼無  
汗雪肌瀟灑難偶好似斜月黃昏瑤階鈿砌百媚初  
含酒惱殺多情香噴噴雙靨盈盈回首傾國傾城千金  
莫惜蘭蕙應難友沈郎拌了為花一味銷瘦

滿庭芳

荷花

欽定四庫全書

惜香樂府  
卷四

二

竹飈斜梢荷傾餘渥晚風初到南池雨收池上高柳亂  
蟬嘶冉冉蓮香滿院夕陽映紅浸庭闌涼生到碧瓜破  
玉白酒酌玻璃 思量浮世事枯榮辱寵歡喜憂悲算  
勞心勞力得甚便宜粗有田園笑傲揀些個朋友追隨  
好時景莫教錯過撞著醉如泥

又

對景

紅藕洲塘黃葵庭院渚風時動清颼素紈輕颼涼色爽  
征衣一一光陰日月關情處前事難期空凝想臨鸞有

恨誰與畫新眉 刀頭心寸折江南  
厚約惟是儂知念  
默歌停舞冷落屏幃何日朱籠鸚鵡迎門報金勒東歸  
羅絃管合歡聲裏爛醉玉東西

好事近

雨過  
對景

山路亂蟬吟聲隱茂林脩竹恰值快風收雨遞荷香芬  
馥 破除愁慮酒宜多把酒再三囑遙想溪亭瀟灑稱  
晚涼新浴

虞美人

雙蓮

欽定四庫全書

二喬姊妹新粧了照水盈盈笑多情相約五湖遊似向  
羣花叢裏騁風流丁香枝上千千結怨惹相思切爭  
如特地嫁熏風吐盡芳心點點絳脣紅

醉蓬萊

新荔枝

正火山槐夏黛葉細枝荔子新摘千里馳驅薦仙源佳  
席浪比龍睛未輸崖蜜燦爛然紅摘滿貯雕盤纖纖素  
手丹苞新擘梨栗粗疎帶酸橘柚凡品多般總羞標  
格何似濃香洗煩襟仙液為愛真妃再三珍重價傾城

傾國王骨冰肌風流醞藉真宜消得

又

端午端

見浴蘭纔罷拂掠新粧巧梳雲髻初試生衣恰三裁貼  
體艾虎宜男朱符辟惡好儲祥納吉金鳳釵頭應時戴  
了千般忙戲那更慇懃再三祝願鬪巧合歡彩絲纏  
臂刻玉香蒲泛金觥迎醉午日熏風楚詞高詠度過雲  
聲脆赤口白舌從今消滅諸餘可意

賀新郎

初夏



篆縷銷金鼎翠沉沉庭陰轉午晝長人靜芳艸王孫知  
何處只覩楊花糝徑正玉枕夢騰初醒門外殘紅春去  
也悶無聊宿酒厭厭病雲鬢髣未懽整江南舊事休  
重省但今朝尋消問息塞鴻難倩月滿西樓凭欄處暗  
數歸期未定又只恐瓶沉金井嘶騎不來銀燭暗枉教  
人立盡梧桐影誰伴我照鸞鏡

踏莎行

涼夜

樹影將圓林梢不動汗珠浥透紗衣重荷風忽送雨飛

來晚涼習習生幽夢  
珠箔高鈎瑤琴閒弄移樽邀取  
嬋娟共今宵拌著醉眠呵夜香聞早添金鳳

醉落魄

重午

淡粧濃抹西湖人面兩奇絕  
菖蒲角黍家家節水戲魚  
龍十里畫簾揭  
凌波無限生塵襪冰肌瑩徹香羅雪  
遊船且莫催歸棹遮莫黃昏天  
外有新月

卜算子

亭上納涼

新月挂林梢暗水鳴枯沼  
時見疎星落畫簷幾點流螢

小 歸意了無多故作連環遶欲寄新詩問採菱水濶  
煙波渺

阮郎歸

送別有感  
因詠鶯作

東城沙軟馬蹄輕清和雨乍晴柳陰曲徑泣流鶯淒涼  
不忍聽 休苦怨莫悲鳴何須雨淚傾但作巧語寫心  
誠東君肯薄情

蝶戀花

初夏

亂疊青錢荷葉小濃綠陰陰學語雛鶯巧小樹飛花芳

徑草堆紅襯碧於中好  
梅子弄黃枝上早春已歸時  
戲蝶遊蜂少細把新詞纔和了  
雞聲已喚紗窗曉

鷓鴣天

夜釣月橋  
賞荷花

新晴水暝藕花紅  
烘人暑意晚來濃  
共攜纖手橋東路  
楊柳青青一徑風  
深翠裏豔香中  
雙鸞初下蓋珠宮  
月籠粉面三更露  
涼透蕭蕭一夢中

江神子

夜涼  
對景

綵雲飛盡楚天空  
碧溶溶一簾風  
吹起荷花香霧噴人

濃明月淒涼多少恨恨難許我情鍾  
相思魂夢幾時窮洞房中憶從容  
須信別來應也斂眉峯好景良宵添  
悵望無計與一樽同

新荷葉

咏荷

冷徹蓬壺翠幢鼎鼎生香十頃琉璃望中無限清涼遮  
風掩日高低襯密護紅粧陰陰湖裏羨他雙浴鴛鴦  
猛憶西湖當年一夢難忘折得曾將蓋雨歸思如狂水  
雲千里不堪更回首思量而今把酒為伊沉醉何妨

臨江仙

初夏

簾幙清風灑灑園林綠蔭垂垂練花開遍麥秋時雨深  
芳艸渡蝴蝶正慵飛 顚顚三春心事風流一弄金衣  
韶光老盡起深思日長庭院裏徙倚聽催歸

朝中措

夏首

荷錢浮翠點前溪梅雨日長時恰是清和天氣雕鞍又  
作分攜 別來幾日愁心折針線小蠻衣羞對綠陰庭  
院銜泥燕燕于飛

減字木蘭花

詠柳

柳絲搖翠翠幄籠陰無限意不絆行舟只向江邊絆客  
愁月明風細分付一江流去水嬌眼傷春誰是章臺  
欲折人

卜算子

夏日送吳主簿

執手送行人水滿荷花浦舊恨新愁不忍論淚壓瀟瀟  
雨行計已匆匆無計留伊住一點相思萬里心誰怕  
關山阻

臨江仙

賞興

柳上斜陽紅萬縷  
烘人滿院荷香晚涼初  
浴略梳粧冠  
兒輕替枕衫子染鶯黃  
蓄意新詞輕緩唱  
慙懃滿捧  
瑤觴醉鄉日月得能長  
仙源正閑散伴我老高唐

雨中花令

初夏  
遠思

綠鎖窗紗梧葉底  
麥秋時曉寒慵起  
宿酒厭厭殘香冉  
冉渾似那時天氣  
別日不堪頻屈指  
回頭早一年不  
啻搔首無言欄干十二倚了又還重倚



畫堂春

輦下遊西  
湖有感

湖光乘雨碧連天，遠堤映草芊芊。  
舞風楊柳欲嘶綿，依  
依起翠煙。還是春風客路，對花空負嬋娟。  
莫寒樓閣，碧雲間，羅袖成斑。

浣溪沙

夜涼  
小飲

露挹新荷撲鼻香，惱人更漏響浪浪。  
柳梳斜月上紗窗。  
小醉耳邊私語好，五雲樓閣羨劉郎。  
酒闌燭暗斷回

腸

西江月

邀蔡堅老忠孝堂觀書

水滿平塘過雨洗粧紅褪芙蓉綠荷弄影蔭龜魚無限  
閒中景趣 瀟洒高堂邃館那堪左右圖書凌雲賦得  
似相如多少風流態度

卜算子

四明別周德遠

閒路踏花來閒逐清和去來去雖然總是閒多少傷心  
處 紅碧好池塘朱綠深庭戶隨分山歌社舞中且樂  
陶陶趣

清平樂

忠孝堂雨過荷花爛然晚晴可人因呈李宜山同舍

水鄉清楚襟袖銷裊暑綽約藕花初過雨出浴楊妃無  
語 葡萄滿酌玻璃已拌一醉酬伊浪捲夕陽紅碎池  
光飛上簾幃

又

初夏舞宴

清和時候底事休文瘦滿酌流霞看舞袖步步錦裯紅  
皺 六么舞到虛催幾多深意徘徊拌了明朝中酒為  
伊更飲瓊盃

浣溪沙

初夏

霧透龜紗月映欄  
麥秋天氣怯衣單  
棟花風軟曉來寒  
嬾起麝煤重換火  
暝香濃處斂眉山  
眼波橫浸綠雲鬟

又

初夏  
有感

薄霧輕陰釀曉寒  
起來宿酒尚酡顏  
柳鶯何事苦關關  
新恨舊愁俱喚起  
當年紫袖看弓彎  
淚和梅雨兩潛潛

鷓鴣天

初夏試生衣而婉卿持素扇索詞因作此書于扇上

牙領番騰一線紅  
花兒新樣喜相逢  
薄紗衫子輕籠玉  
削玉身材瘦怯風  
人易老  
恨難窮  
翠屏羅幌兩心同  
既無閒事  
縈懷抱  
莫把雙蛾皺  
碧峯

菩薩蠻

初夏

方池新漲蒲萄綠  
曉來雨過花如浴  
測測杏園風  
梢頭一片紅  
危樓愁獨倚  
一寸心千里  
宿酒尚微醺  
嬾粧堆髻雲

西江月

夏日有感

穩唱巧翻新曲靈犀密意潛通  
荷花香染晚來風相對  
恍然如夢 有恨眉尖皺碧  
多情酒暈生紅此愁不是  
等閒濃應為仙源傾動

浣溪沙

初夏

睡起風簾一派垂  
失巢燕子傍人飛  
日長深院委香泥  
綠筍出林翻錦箨  
紅葵著雨褪胭脂  
微風度竹入輕衣

蝶戀花

和任路  
分荷花

憶昔臨平山下過無數荷花照水無纖黥短艇直疑天  
上坐醉眠花裏香無那雨浥紅粧嬌娜脉脉含情  
欲向風前破莫道晚來風景可青房著子千千顆

浣溪沙

為王叅  
議壽

密葉陰陰翠幄深梅黃弄雨正頻頻榴花照眼一枝新  
緋嶺有人今毓粹飛鳬不日遙嚴宸一樽敬壽太夫

人

又呈趙  
狀元

雨過西湖綠漲平，環湖密柳暗藏鶯。  
對策有人新切直，逢春不日盡施行。  
扁舟未用速歸程。

青玉案

壓波  
觴客

結堂雄占雲煙表，萬象爭呈巧。  
老木參天溪四遶，亂山橫秀一湖澄。  
照天付陰晴好，夜空喚客清樽倒。  
明月飛來上林杪，涼滿九霄風露浩。  
酒慵起舞一聲清嘯平。



壓波聲小

又

恍如遼鶴歸華表閱盡人間巧天乞一堂山對遶微波  
不動岸巾時照照見星星好舞風荷蓋從欹倒碧樹  
生涼自天杪誰識元龍曾次浩騎鯨欲去引盃獨嘯醉  
眼青天小

謁金門

一雨掃煩暑自漉  
玉友醉餘因次韻

今夜雨掃盡一番袪暑宛似瀟瀟鳴遠浦短篷何日去

自漉牀頭玉醕清興有誰知否反笑功名能幾許槐  
宮非浪語

惜香樂府卷四

欽定四庫全書

惜香樂府卷五

宋 趙長卿 撰

秋景

念奴嬌

客豫章秋  
雨懷歸

江城向曉被西風揉碎一天絲雨亂織離愁千萬縷多  
少關心情緒促織鳴時木犀開後秋色還如許那堪飄  
泊異鄉千里孤旅 應想簾幙閒垂西樓東院齊把歸

期數記得臨歧收淚眼執手叮嚀言語白酒紅萸黃花  
綠橘莫等閒孤負朱籠歸騎甚時先報鸚鵡

又

秋日  
牡丹

花王有意念三秋寂寞淒涼天氣木落烟深山霧冷不  
比尋常風味勒駕閒來柳蒲顚顚無限驚心事仙容香  
豔儼然春盛標致雅態出格天姿風流醞藉羞殺巖  
前桂寄語芙蓉臨水際莫騁芳顏妖麗一朵凭欄千花  
退避惱得騷人醉等閒風雨更休憐憊容易

聲聲慢

府判  
生辰

金風玉露綠橘黃橙  
秋爽氣飄逸南斗騰光  
應是間生賢出照人  
紫芝眉宇更仙風誰能  
儔匹細屈指到小春  
時候恰則三日莫論  
早年富貴也休問文章  
有如椽筆堯舜逢君  
啟沃定知多術而今  
且張錦幄麝煤泛暖  
香鬱鬱華堂裏聽瑤  
琴輕弄水仙新律

瑞鶴仙

張宰  
生辰

西風蘋末起動院落  
清秋新涼如水纖歌  
遏雲際正美

人翻曲陽春輕麗蘭衣玉佩擁南斗光中一醉有邦人  
萬口同聲贊嘆我公愷悌 百里年豐穀稔事簡刑清  
頌聲盈耳鵬程九萬摩空展垂天翼定丹書飛下彤墀  
歸去秘略家傳小試看封留亘古功名未容退避

滿庭芳

七夕

雨洗長空風清雲路又還準備佳期夜涼如水一似去  
秋時渺渺銀河浪靜星橋外香靄緋緋霞輶舉鸞驂鵲  
馭穩穩過飛梯 經年成間阻相逢無語應喜應悲怕

玉繩低處依舊睽離和我愁腸萬縷嫦娥怨底事來遲  
廣寒殿秋風桂魄首與慰相思

水調歌頭

中秋

今夕知何夕秋色正平分嫦娥此際底事越樣好精神  
已是天高氣肅那更清風灑灑萬里沒纖雲把酒臨風  
飲酒面起紅鱗歌一曲舞一曲捧金樽從他妄想老  
兔傾顛正紛紛我為桂花拌醉明日扶頭不起顛倒白  
綸巾天若知人意夜雨莫傾盆



驀山溪

憶古人詩云滿城風雨近重陽因成此詞

滿城風雨又是重陽近黃菊媚清秋倚東籬商量開盡  
紅萸白酒景物一年年人漸遠夢還稀贏得無窮恨  
釵分鏡破一一開方寸強醉欲消除醉魂醒淒涼越悶  
鴛鴦宿債償了惡因緣當時事祇今愁斑盡安仁鬢

洞仙歌

木犀

菱荷已老菊與芙蓉未一夜秋容上巖桂間繁蕪嫩黃  
染就瓊瑰開未足已早香傳十里從前分付處明月

清風不用斜暉照佳麗嘆浮花徒解咤淺白深紅爭似  
我瀟灑堆金積翠看天闊秋高露華清見標致風流更  
無塵意

虞美人

中秋  
無月

西風明月臨臺榭準擬中秋夜一年等待到而今為甚  
今宵陡頓却無親姮娥應怨孤眠苦取次為雲雨素  
蟾特地暗中圓未放清光容易到仙源

醉蓬萊

七月命赴漕試蘭臺主人餞於法回  
寺侍兒才卿乞詞因此賦之題於壁

正金風無露玉宇生涼楚郊無暑催起行人恰槐黃時  
序萬里晴霄幾人爭覩快鵬搏一舉明月圓時素秋中  
夜凌雲新賦 那更淵源詞鋒輕銳筆陣縱橫學通今  
古譽望飛騰是麟宗文虎魁薦歸來華堂香裏與管弦  
為主待看明年彤墀射策鰲頭獨步

洞仙歌

殘秋

黃花滿地庭院重陽後天氣淒清透襟袖動離情最苦  
旅館蕭條那堪更風翦凋零飛柳 臨岐曾執手祝付

叮嚀知會別來念人否為多情生怕分離祇知道準擬  
別來消瘦甚苦苦促裝赴歸期要趁他橘綠橙黃時候

夏雲峯

初秋  
有作

露華清天氣爽新秋已覺涼生朱戶小窻坐來低按秦  
箏幾多妖豔都總是白雪餘聲那更玉肌膚韻勝體段  
輕盈照人雙眼偏明况周郎自來多病多情把酒為  
伊再三著意須聽銷魂無語一任側耳與心傾是我  
不卿卿更有誰可卿卿

感皇恩

送林縣尉

碧水浸芙蓉秋風楚岸三歲光陰轉頭換且留都騎未  
許匆匆分散更持盃酒慇懃勸休作等閒別離人看  
且對笙歌醉須判如君才調掌得玉堂詞翰定應不久  
勞州縣

瑞鶴仙

殘秋有感

敗荷擎沼面紅葉舞林梢光陰何速碧天靜如水金風  
透簾幙露清蟬伏追思往事念當年悲傷宋玉漸危樓

向晚魂銷處倚遍闌干曲  
凝目一霎微雨塞鴻聲斷  
酒病相續無情賞處金井梧東籬菊漸蘭橈歸去銀蟾  
滿夜水村烟渡怎宿負伊家萬愁千恨甚時是足

臨江仙

送宜春令

萬里西風吹去旆滿城無奈離情甘棠也似戴公深曉  
來風露裏葉葉做秋聲  
十載兩番遺愛在須知愁滿  
宜春楚天低處是歸程夕陽疎雨外莫遣亂蟬鳴

又

秋日有感

楓葉白蘋秋未老晚風吹泛輕艫青山瀝瀝水茫茫情  
隨流水遠恨逐暮山長一點相思千點淚眼前無限  
情傷佳人猶自捧離觴陽關休唱徹唱徹斷人腸

鷓鴣天

深秋  
悲感

亭樹蕭蕭生暮涼安排清夢到胡牀楚山楚水秋江外  
江北江南客恨長蘋渚冷橘汀黃斷魂殘夢更斜陽  
欲將此日悲秋淚灑向江天哭楚狂

驀山溪

秋日賀張  
公生辰

木犀開了還是生辰到一笑對西風喜人與花容俱好  
壽筵開處香霧撲簾幃笙簧奏星河曉拌取金罍倒  
當年仙子容易拋蓬島月窟與花期要同向人間不老  
拈枝弄蕊此樂幾時窮一歲裏一番新莫與蟠桃道

水調歌頭

陽重

江水浸雲影鴻雁欲南飛攜壺結客何處空翠渺烟霏  
塵世難逢一笑況有紫萸黃菊須插滿頭歸風景今朝  
是身世昔人非酬佳節須酹酹莫相違人生如寄何



用辛苦怨斜暉無盡今來古往幾許春花秋月那更有  
危機問取牛山客何事獨沾衣

踏莎行

木犀

弄影攔干吹香巖谷風亭糝作黃金屋未須收拾入熏  
爐窻前細把離騷讀奴僕葵花兒曹黃菊一秋風味  
淒涼足旁邊只少個嫦娥分明勝在蟾宮宿

臨江仙

初秋

獵獵風蒲初暑過蕭然庭戶秋清野航渡口帶烟橫晚

山千萬疊別鶴兩三聲  
秋水芙蓉聊蕩漿一樽同破

愁城蓼花灘上白鷗明  
莫雲連極浦急雨暗長汀

醉落魄

秋夜感懷

傷離恨別愁腸又似丁香結  
不應斗頓音書絕  
烟水連天何處認紅葉  
殘更數盡銀缸滅  
邊城畫角聲嗚咽  
羅衾淚滴相思血  
花影移來搖碎半窗月

好事近

秋殘

初過菊花天  
餞送月宮仙  
客丹桂拒霜濃  
淡映眉間黃

色紅帟歌夜飲離觴努力赴勅敵惟願捷書來到道  
一聲都得

菩薩蠻

七夕

綺樓小小穿針女秋光點點蛛絲雨今夕是何宵龍車  
烏鵲橋經年謀一笑豈解令人巧不用問如何人間  
巧更多

卜算子

秋深

涼夜竹堂空小睡匆匆醒庭院無人月上堦滿地闌干

影何處最知秋風在梧桐井夜半驂鸞弄玉笙露濕  
衣裳冷

點絳脣

蓼岸西風小舟江上漁歌唱倚欄凝想冪冪雲垂帳

好事因循寂寞閒惆悵如何向又來心上空向高亭望

好事近

晚秋

浙浙蓼花風怪道曉來淒惻翻見密雲拋雨動一山秋  
色從前多感為傷時無處頓然寂箇事已寒前約祇

晚陰凝碧

思越人

秋日  
感懷

情難托離愁重  
悄愁沒處安著  
那堪更一葉知秋天色  
兒漸冷落  
馬上征衫頻搵淚  
一半斑斑污却別來為  
憶叮嚀話空羸得瘦如削

小重山

秋雨

一夜西風響翠條  
碧紗窻外雨長涼  
颼潮來綠漲水平  
橋添清景疎韻入芭蕉  
坐久篆烟銷多情人去後信

音遙即今消瘦沈郎腰悲秋切虛度可人宵

採桑子

桂岩

去年岩桂花香裏著意非常月在東廂酒與繁華一色  
黃今年孟酒流連處銀燭交光往事難忘待把真誠  
問阿郎

朝中措

曾端行子與之往還一日作樓於南山仙源醉賞酒中作詞書於壁生前數妓乞詞

而歌以勸大白因有所感再和前韵詠秋景

柳林冪冪暮烟斜秋水淺平沙樓外碧天無際紫山斷

處橫霞 星稀漸覺東簷隱  
涼月到牕紗多少傷懷往  
事隔溪燈火人家

又和

征帆一縷轉彎斜  
驚鷺起汀沙  
點點隨風逆  
上滿江飛  
破殘霞  
樓前光景樓心紅粉蟬翼輕紗  
却憶錢塘江  
上曲欄橫檻他家

洞仙歌

東園朱遜年三兄弟同處十年俱取鄉薦  
故余與之為莫逆交園有岩桂數畝至秋

日花開月滿攜壺來賞  
如到廣寒宮殿因賦此

廣寒宮殿不在人間世分付天香與岩桂向西風搖曳  
處數十里知聞金翠裏別有出羣標致東園盛事五  
畝濃陰芘必以詩書取榮貴況一門三秀才未足欽崇  
那更是異姓同居兄弟更細把繁英祝姮娥看禹浪飛  
騰定應來歲

似娘兒

或刻青杏  
兒詠殘秋

橘綠與橙黃近小春已過重陽晚來一霎霏微雨單衣  
漸覺西風冷也無限情傷孤館最淒涼天色兒苦恁



恹恹離愁一枕燈殘後睡來不是行行坐坐月在迴廊

蝶戀花

深秋

一夢十年勞憶記社燕賓鴻來去何容易宿酒半醒便  
午睡芭蕉葉映紗窻翠襯粉泥書雙合字鸞鳳鴛鴦  
總是雙雙意已作吹簫長久計鴛衾恐有中宵淚

夜行船

送胡彥直  
歸槐溪

淚眼江頭看錦樹別離又還秋暮細水浮浮輕風冉冉  
穩送扁舟去歸去江山應得助新詩定須多賦有雁

南來槐溪千萬寄我驚人句

清平樂

秋莫

鴻來燕去又是秋光莫冉冉流年嗟暗度這心事還無  
據寒窻露冷風清旅魂幽夢頻驚何日利名俱賽為  
予笑下愁城

又

秋容眼界隨寓渾堪愛遠岫連天橫淡靄望斷孤鴻飛  
外夕陽紅樹林垆重重錦障橫陳一段江南景色倩

誰為下丹青

一翦梅

秋雨  
感悲

霽靄迷空曉未收  
羈館殘燈永夜悲  
秋梧桐葉上三更  
雨別是人間一段  
愁睡又不成夢又  
休多愁多病當  
甚風流真情一點  
苦縈人纔下眉尖  
恰上心頭

南歌子

道中直  
重九

此日知何日他鄉憶故鄉  
亂山深處過重陽  
走馬吹花無復少年狂  
黃菊擎枝重紅茱濕露香  
扁舟隨雁過

瀟湘遙想菜庭應恨不同觴

醉花陰

建康重九

老去悲秋人轉瘦更異鄉重九人意自淒涼祇有茱萸  
歲歲香依舊登高無奈空搔首落照歸鴉後六代舊  
江山滿眼興亡一洗黃花酒

菩薩蠻

秋雨船中

西風轉柂蒹葭浦客愁生怕秋闌雨衾冷夢魂驚聲聲  
滴到明不眠歌枕聽故故添新恨新恨有誰知天寒

雁正稀

又

秋老  
江行

炊烟一點孤村迴  
嬌雲斂盡天容淨  
雁字忽橫秋  
江瀉客愁  
銀鈎空寄恨  
恨滿憑誰問  
袖手立西風  
舟行秋色中

浣溪沙

早秋

雨滴梧桐點點愁  
冷催秋色上簾鈎  
蛩聲何事早知秋  
一夜涼風驚去燕  
滿川晴漲漾輕鷗  
懷人千里思悠悠

悠

惜香樂府卷五